

帶經堂集

帶經堂集卷五

歙門人程哲校編

新城王士禛題上

漁洋詩五

己亥稿

三月大雪

風光連上已急雪忽霏霏
欲伴桃花發真兼柳絮飛
飛舟馳天外戍馬象日南
歸咫尺條風令春和顛
豈遠

雪後懷家兄二首

竹林上斜照陋巷無車轍
千里暮相思獨對空庭雪

別緒隨潮水潺湲日夜流東風如有便遙寄海西頭

懷桐實客鄴

鄴下山河美頻年感廢興秋風渡漳水斜日弔韓陵
四代浮雲過三臺古木增論才公讌後君得似
崔陵

別麻城萬大屏秀水楊勝林

別鶴念湖海離羣秋夜心風聲鄭口暮江色禦亭
深去路分吳楚相思各滯淫關門今夕雨蕭颯動
寒砧

廣固懷古

夕陽遙指慕容城
亂後春田半廢耕
峴口似聞迎晉騎
洛陽無復下秦兵
金刀玉璽千秋淚
鐵馬銅駝萬古情
若向秣陵尋舊蹟
琅琊邸第草痕生

得海石山中書時遷高要令不赴

夕陽下西南琅琊杳
何處聞君頗學道
山中樂遲暮松窓讀書開
禪堂飯僧住
蒼蒼鐘磬音渺渺
漁樵路柴門
三日雪不辨原上樹
斷雲南山來時過
北山去閒尋盧敖
隱遠躡僧紹
步既愜躬耕懷復抱
臨深懼如何
嶺頭人冥行畏多露

題天然道人院用韋公義濱法師西齋韻

到來澗聲小寂歷聞初磬嘉樹帶修廊蕭然悅幽
性香散維摩室日入采樵徑相對坐忘言徘徊遠
天暝

臨淄懷古

臨淄佳麗古名都萬戶凋殘半有無碧草淒迷故
宮廢青山迴合女牆孤爽鳩世遠餘荒碣戲馬人
空失霸圖龍女祠前春水闊東風如舊遶平蕪

法慶寺閣上望雲門山

祇園有珠閣高出碧林端落日眺平楚青山生暮

寒歸雲天際去遠樹坐中看今夕雲門月無人照
戒壇

與洞門別二首

齋堂夕鐘罷衆鳥歸飛急相送虎溪頭徘徊仍佇
立
苔色砌邊合禪扉林下開誰能伴都講獨有許詢
來

即目

蒼蒼遠煙起槭槭疎林響落日隱西山人耕古原
上

夜經古城作

我行牛山下寒墟帶平楚不見齊王宮空城半禾黍
疎星耿不明白楊夜深語

大理石屏歌為少傅劉公賦

少傅堂中蒼石屏竦峙嵯峨高七尺黝質離離光
可鑑六月蒼茫起寒色洞壑窈窕冰雪生峰巒槎
枒雲物積空中瀑布遠欲飛檐前雨雹晴相射坐
來恍忽秋天高廬霍千峰在几席我公家近三神
山麗農方丈環青碧黃扉坐論方促膝却有閒情
寄泉石即今天威播南詔爨棘昆明盡重譯點蒼

山色碧雞雲移來天闕辭荒僻由來漢相最承恩
中書直取屏風隔

南園作二首

曉起思園林昨夜西堂雨負杖眺前山初陽散平
楚淶池萍始合芳樹禽交語庭戶寂無人慨焉念
終古

夜雨雜花落衡門綠苔生誰能捉坐席共作林下
行圓荷舒午景茂林含夕清歸禽赴斜照稅駕此
山楹

南園池上

清言不覺暑纖月生西林苔徑少塵色夜猿清道
心漁樵晚多侶風壑靜同音會學涓高術陰潭鳴
玉琴

得王振嶽柳公隆柏君房書及曾道扶過清

源見寄之作

故人杳何許居處夾清漳西望雲山遠東風春草
長素書勞驛使別語憶河梁千里駕湖水應同明
月光

南園水亭即事懷先祖方伯公

公自號明農隱士

三月風亭上林深鳥語繁山雲遙變夏水草靜當

軒昔日東山隱明農此灌園風流不可即流歎滿
丘樊

送胡端孩赴長沙

青草湖邊秋水長黃陵廟口暮煙蒼布帆安穩西
風裏一路看山過岳陽

十載

十載華陽路天心厭枕戈魚鳧天險絕龍鶴戰聲
多棘女能巴舞賓人解漢歌梁州師旅勁即次近
岷峨

雨夜與禮吉子側共宿

高館多梧桐微雨飛向夕清談不能寐入夜轉蕭索
餘香歇幽幌暗蟲響堦石夢破忽沉吟悵然赴鄉客

魯連陂

不作平原客終成蹈海名至今天下士猶說魯先生

清涼寺

朝日出浦口遙見清涼寺深竹不逢人經聲在空翠

諸葛武侯廟

不見錦官城猶聞蕩陰里蘆荻夕陽中空祠映寒水

鵝鴨城

傳是慕容城殘荷沒碑影復道阿超年金鷺記元鼎

錦秋亭

蘇公不可見湖水猶今昨斜日古亭間水花自開落

寄廬山靈道人越中

遠攜瓢笠去羅浮開社東林幾度秋冰雪晝聽三

映水雲霞春眺九江流散齋鷁下香臺暝咒盃龍
歸曉殿幽何日西來華頂鶴遺民相待虎溪頭

阻雨望醴泉寺用昌穀韻

誌公飛錫處巖壑至今深渺渺青山路蒼蒼修竹
林法雲懸瀑影幽鳥亂泉音自歎塵中駕空勞出
世心

旅舍見新燕

野店官橋路深春乳燕飛豈知人事改猶向社前
歸林木巢非舊雕梁額竟違舊家王謝在漂泊惜
鳥衣

題高蘇門集

我愛蘇門子風流軼昔賢躬耕汲水上薄宦楚江
年五字追陶謝千秋過鄭邊如鸞清嘯遠遺韻至
今傳

題徐迪功集

昭代嬋娟子徐卿雅好文稱詩如典午譚藝似參
軍漢落雲霞質飄搖鸞鶴羣祇應禹洞裏靈蹟待
夫君

寄董樵

聞卜崑崙宅棲遲歲幾更人煙分蜃影海嶠出秋

晴島屋閒垂釣山田晚罷耕多君離亂日白社獨
逃名

寄東癡

與君西山時禪宇何妍雅珍木羅幽軒清溪照涼
夜月明登高臺千峰宛階下棲禽竹中鳴飛泉壁
間瀉一別柴桑遊常思遠公社

淀中行憶故園湖居二首

金剛堰上水平沙居士祠前白藕花画楫短蒲微
雨裏多將龍具上漁槎

貝丘城外晚煙圍沙燕鳩鵲作隊飛漁父唱歌天

際去遊人簫鼓月中歸

對雨感懷

青春復行役望遠益愁心
搖落悲身事蕭條念故
林明燈惟對酒寒雨易
霑襟誰念關門客依依
莊舄吟

雨次鄭州

薄暮虞丘道煙波清淺流
溼雲低去鳥寒雨凍眠
鷗歲月高堂思關河獨
夜愁何當脫塵鞅行矣
任歸休

雄縣二首

二方五十七
暮雲沙磧路驅馬獨行吟落日雄關險悲風易水深天低圍朔漠地古界遼金百戰黃圖盡蕭條榆樹林

慘淡幽并色雄圖果壯哉六羸分帳出萬騎射雕來上谷風沙晚漁陽鼓角哀太平須士馬突兀羽林材

讀甯益賢近詩示劉大公敵二首

甯是公敵外甥

劉家兄弟美無倫公子芳蘭佩正新嘗憶荀陳風味好清流真見潁川人

劉生絕似柳文暢清晝撫琴松下眠復有賢甥理

高咏時聞風雨落秋天

評公敵慈仁寺寓并示益賢二首

窈窕禪宮掩雙松歲月深披衣聞石瀨晏坐理朱
琴湖海三年別雲霄萬里心舅甥王衛似相對發

高吟

衛洗馬是
王武子甥

聞汝西湖上風流繼往賢林園清潁尾賓客朗陵
年柳蔭移珍簟荷香擢酒船即今共搔首悵絕薊
門天

戲爲周量題畫短歌

龜茲蒲萄新吐蔓青州來禽色凌亂木瓜冰桃紛

三才二
錯陳妙筆何來眼中見我客漁陽別舊山千林垂
實夢中攀高堂絹素生秋色苦憶田廬未得還

與周量過訪苔文夜雨共宿

故人千里別春草萋已綠相思南雲端目盡東海
曲復作帝城遊乘暇慰幽獨入門涼蟬鳴中庭多
嘉木石徑生積陰蒼苔宛山谷坐久微風來雨聲
雜深竹共有滄浪興復縱青山目良會誰能常今
宵得同宿

送許源仲赴太平

天門南下楚雲東擊楫初乘破浪風郡閣三春收

鶴毳人家百里挂魚筒江頭白紵思桓武郭外青山識謝公猶有吳波亭上月流光不隔與君同

無題四首

聞道盧循衆長驅薄五湖戍增新北府烽急古南都
艣艣遙連越輸供本在吳上游須早計還見士
行無

幕府山頭望蒙衝雜羽旗大桁當晝閑飛檄入秋
馳淮海方酣戰荊襄正濟師昆明新露布消息動
江渚

不識舟山險驚濤過海門射陂新戰壘滬瀆舊營

屯犀兕迎秋銳蛟龍入夜喧
即聞傳禁旅組練出中原

天塹襟喉重淮揚數郡開
北流通汴泗東望達膠萊
置瓠連營地沉旂決勝才
何當報三捷追北越王臺

與荅文

執戟爲郎日離居臥病年
鄉心禹洞水歸夢太湖田
抗跡思霞表含香且日邊
終期吳市隱廡下接高眠

帶經堂集卷五

帶經堂集卷六

歙門人程哲校編

新城王士禎貽上

漁洋詩六

己亥稿

聽公戢彈琴三首

秋靜垂簾拂玉琴，紺園風日正蕭森。
迴絃更作清商曲，無限瀟湘萬里心。

秋來日日聽長松，天淨雲閒欲御風。
一理金徽向遙夜，冷然翻在七絃中。

彈御風操

莫向華陽問廣陵，竹林人去絕音聲。
與君更作他年約，黃鵠山中訪戴行。

過潘進也觀海棠因共弈有贈

風日清秋美都忘搖落時故人姑射客名卉錦城
姿岸幘宜高詠垂簾得劇棋不因潘騎省乘馬欲
何之

送張東巖赴汝寧

有美張公子猶煩佐郡行山鄰黃歇宅俗近白公
城鴻鴈秋風起薜蘿暮雨生清淮三五月應為使
君明

戲放弇洲先生足古語成詩二首

簡與禮相背嬾與慢相成自緣林壑性不是學嵇

生

三人持衣裾四人捉坐席頗憶故園時山徑無殘
客

過譚菊澗因憶兗州趙使君

七載相思入夢頻高魚煙樹不勝春今宵共翦燕
山燭却憶靈光殿裏人

送喬元聞赴沅陵二首

欲問辰州路煙波接桂林停帆湘水曲吹笛武陵溪
深瘴癘天南息丹砂世外尋衡陽望不遠迴雁故
鄉心

楚國青楓晚南帆過洞庭黃陵當極浦斑竹映寒汀
秋入湘妃怨人悲漁父醒因風薦蘋芷爲我弔
□靈

九日黑窯廠登高同曹頤菴彭駿孫四首

寒雲蕭瑟古今哀攜客同登萬里臺宮闕蒼茫生
返照山川突兀入銜杯風高九塞悲笳起木落三
關朔雁來惆悵東籬兄弟在故園黃菊背人開
對酒當歌勸濁醪紛飛木葉下亭臯談經江左中
朝貴戲馬彭城六代豪銅鼓雄師開瘴癘朱方新
戍亂波濤蒼然平楚商風裏咫尺雲天首重搔

大漠東來走令支山河明滅影參差滹沱濁浪淩
秋急碣石寒雲出塞悲九日登臺思郭隗十年長
事少素絲重來擊筑商歌苦菊蕊楓彫又一時
蘭蕙初薰拂素波佳期眇眇奈愁何憑高且盡燕
姬酒異地長為楚客歌廢苑人稀衰草合諸陵秋
老夕陽多遠遊寂寞湘潭侶欲載雲旗問九河

送懷人下第歸楚兼寄亦世

九月天涯菊有芳送君離思滿江鄉寒楓帶雨臨
漳水秋鴈隨人過漢陽敝履幾年愁北郭公車猶
自滯東方吾家平子聲名久報爾相思擊筑旁

同馮三如源思天寧寺觀浮圖

千載隋皇塔嵯峨俯舊京
相輪雲外見珠網日邊明
淨土還朝暮滄田幾變更
何當尋法侶林下學無生

集公弼寺寓贈伯琴上人

上人精
琴理

佳日遲玄度名流見法深
高談宛西寺開社即東林
支枕松風晚聞鐘花漏沉
還將山水思一問伯牙琴

賦得江猿吟翠屏送陸子之巴州

爲客三巴路迢迢獨夜舟
斷猿巫峽暝寒雨蜀江

流合沓來層嶂淒其入暮秋此中腸斷絕莫問楚
昭丘

送僧歸苕中

還持杯渡益言返道場山定識珠旛寂心依玉磬
閒衲衣行雪後溪水出人間茗霅煙波裏花時好
閉關

題杜工部秦州像為梁大曰緝二首

杜陵人不見遺照自輝光離亂經天寶艱難剩草
堂東屯田父宅西閣楚人鄉才子千秋淚青蓮亦
夜郎

靈武中興日秦州旅食年羌戎常雜處崖谷到今
傳意氣凌天馬幽愁拜杜鵑瞻依思往事攬涕一
潸然

寄內二首

跡是遊秦日情非入洛年遙憐香閣裏獨坐理鳴
絃明鏡慚孤影愁妝減舊妍機中兩行淚莫遣溼
吳綿

偕隱龐公婦家風儒仲兒挽車當早歲礪雪及芳
時弱柳垂前戶寒梅發後池曰歸仍未卜悔別易
前期

用皇甫司勳九日懷兄弟韻寄家兄禮吉子

側

吳關征戰後鄉信又經秋已感繁欽思還深謝監
愁雁辭榆塞雪霜下玉河流何事慚鄉里平生馬
少游

初夏北上過訪愚山督學陶齋有詩貽寄久
未奉荅復聞宣城寇亂感懷二首

迴颺起天末落葉滿山城嘉會一相失羈愁自此
生花殘嶠湖路雁帶魯門情自枉瑤華贈無由遠
寄聲

二萬千
烽火照青溪，柵新林，鬪艦多。王師殊不戰，盜賊竟如
何。春穀空，煙水梅湖，剩薜蘿。江南離亂後，庾信幾
悲歌。

九日同曹顧菴彭駿孫用重陽登高爲韻兼
寄陳子更四首

大漠斜陽裏，千山紫翠重。寒煙生獨鹿，古戍隱盧
龍。搖落辭芳樹，蕭條起禁鐘。故鄉望不見，莫上最
高峰。

迢遞金風起，登臨下夕陽。故人皆屈宋，秋意似瀟
湘。塞上蘼蕪歇，江城蘅杜香。所思空偃蹇，遠道不

勝長

薊丘臨朔漠慷慨此同登古塞三千里荒煙十四
陵鼓笳秋慘淡鵬鶚暮飛騰憑弔悲今昔風前意
氣增

酒人不可見躑躅憶荆高易水流難盡西風萬里
濤山川猶朔塞詞賦且凌蹕邨更黃花晚當杯勸
濁醪

與公弼

偶然辭舊野復欲遂初衣清潁雲山遠春明客夢
稀寒松當几席流水入琴徽自昔聞通隱陶公詎

三
三
三
憶歸

高奴城歌送顧翊文之鄜州同駿孫作

君不見高奴城蒼蒼橫百里三秦征戰幾千年夕
照荒煙但殘壘武塘顧生才且賢盛年獻賦明光
前即看姓字滿南北却遣無媒之洛川洛川迢遞
三川水涇渭西流去何已登高不見五原人空眺
長城暮煙紫顧生爾豈百里才風塵濩落何為哉
此去且揮白羽扇懷人莫問黃金臺顧生勸爾一
杯酒世事浮雲復何有專城五馬亦不賤漢家況
重扶風守兩年與爾同情親長安客舍仍比鄰一

朝揮手入關去五噫應念高生貧銀河漸稀曉星
沒千騎東方待明發高齋若憶杜陵詩相思遙寄
鄜州月

巴州歌再送陸子同荅文作五首

西望三川紅樹秋秦雲蜀棧兩悠悠此中水似離
心曲天際長懸巴字流

使君擁傳暮春時蜀道花濃錦浪吹雲盡水連巴
子國月明人到竹郎祠

李巖城邊粉水清相如橋外錦江明錦江游女粉
江水南部風流無限情

巴東驛路接巴西薄暮清後到處啼自是行人聽
不得嘉陵江上草萋萋

巴兒妙舞得人情巴女清歌舊有名碧玉樓中無

吏事垂簾歌舞臥桃笙

巴人以竹
簾為桃笙

題公弼蘇門圖卷

曾學如鸞盲心懷汲縣遊秋清嘯臺月竹映百泉
流小隱何年卜名山一卷收聊當共嵇阮把臂向
林丘

紀事二首

龍旂豹尾急傳呼詔幸昌平出上都復土重增新

宿衛期門先召大句臚

天壽蒼涼石獸陳荒原驚見翠華春
君王淚灑思陵樹玉盃金鳥感侍臣

冬日過金魚池二首

記來劇飲暮春天絡馬青絲白玉鞭
却倚迴闌望珠箔吳歌趙舞為君妍

折葦荒蒲臨斷岸暮雲寒雪壓重樓
獨坐不見高陽侶斜日煙波迴自愁

無題同彭十駿孫作八首

雲母屏風玉女扉上清名字見應稀
花浮綺戶初

移鏡香煖熏籠欲換衣促坐定知寒乍劇餘魂猶
憶夢相依隴西上計前宵去聽盡瓊籤嬾下幃
堂前七十二鴛鴦桂樹生花各著行香霧霏微更
乍歇銀河清淺夜初長却頭頻促挑鐙坐殢酒難
勝拂簾涼惆悵青春忽十載不禁團扇掩啼妝
青瑣蕭晨碧蘚滋新鶯新絮殿春時似疎更密蘋
花雨已落猶開豆蔻枝洛浦神人工拾翠魏家公
子妙彈棋此中便擬長生約閨苑蓬山那得知
珠閣金屏暑氣收深閨午夜待牽牛三叢繚繞蒲
為鍛七寶光明玉作鉤天上碧雲方薄暮人間紅

杜易驚秋壽陽曲水清如鏡那得淮波一處流
輕雷含雨過增城人別金塘花氣清心似西泠松
柏老愁如東冶暮潮生游絲百結空縈恨屬玉雙
飛若有情從此銀河漸迢遞廣寒樓閣罷吹笙
憶昔殘宵有夢通花陰深鎖戟門東三春怨結蕉
心碧五夜愁消燭淚紅親試畫睂明鏡裏詎聞響
屨曲廊中方山亭下江津水自此蘭橈逐斷鴻
玉階紅藥號將離花信風輕解盡吹淚似湘君留
鳳竹情如園客作蠶絲拚爲蜀纈露殘粉顚學吳
綾印口脂何日渡江雙桂楫青溪同拜小姑祠

十二瓊樓碧玉居西風消息眇愁予青陵有鵲能
求侶丹水無魚莫寄書鬢影敲斜迴夢後衣香縹
緲洗妝初縱教妙筆煩周昉寫徧生綃恐不如

答別御史大夫龔公兼呈荅文公敵禹疏秋
厓周量聖秋石潭紫來黃湄諸君

北府新軍領上遊蕪城歌吹咽寒流浮湛京洛人
將老蕭瑟江關戰未收河朔清樽初送遠竹西明
月獨登樓春來無限隋堤柳攀折何因寄別愁

水心精舍圖爲大司馬梁公賦二首

恒陽城外水煙長萬頃寒波帶草堂夾岸芰荷通

竹里行人疑是輶川莊

洛下名園俱寂寞平泉花木半蕭森公家堂構千
年在水石悠然閱古今

贈別姚子上赴瓊州二首

執手臨期歲欲除朱鷺遙指瘴雲孤歸帆更渡三
湘水叱馭新經九折途蠻戶恩霑天外郡鮫人淚
滴日南珠春來東閣梅花發試問羅浮夢有無
惆悵前期未易逢離筵別酒似春濃清淮霽雪人
千里瓊海蠻煙水萬重去路漸迴衡嶽雁相思同
憶景陽鐘極知歲月閒居好底向風塵老鬢容

天寧寺夜宿留別家兄并呈禮吉北山兩兄
共是思鄉客臨岐空復情攬袂謝京邑卒歲返柴
荆旅夢懸渚水孤帆向楚城招提霜月夜相對覺
愁生

再別姚子

白水連沙磧行人欲別難青山將落日立馬幾回
看漢口人煙少荊江夜雪寒那堪更萬里遙去嶺
雲端

留別周量

忍作病中別遂爲千里行征蓬辭朔吹急雪黯王

程粵海無消息天涯幾弟兄祇應親藥餌聊以慰
離情

留別公猷并懷甯子二首

君向蘇門去棲遲更幾春悠悠潁川水不見潁川
人
潁水流無極經年少報書淮南紅樹裏相憶復何
如

留別茗文二首

海內談詩日人傳我輩狂遠遊羨宗炳疎懶似嵇
康姓字慚龍腹文章忝雁行橫門今日別攜手已

神傷

客閣如蓬戶招尋數往來叩門落松子折屐破蒼苔
書札朝朝見新醪夜夜開西州消息斷無夢到寒梅

抵里後作寄家兄

經年河朔客歲晏返空林燈火高堂酒風煙故國心
徒嗟鴻鵠志愁問鵲鴿音早有名山約蹉跎適至今

銅雀臺送陳竹居歸臨漳

銅雀臺濁漳路臺下悠悠漳水流西陵月照空煙

樹君家門對濁漳濱曾向漳流賦感甄今日相思
那可道年年芳草鄴城春

帶經堂集卷六

帶經堂集卷七

歙門人程哲校編

新城王士禎貽上

漁洋詩七

庚子稿

湖上送愚山督學歸宣城二首

一樽藉芳草離思杳難任
東路風光徧春江日暮
深煙條歷陽樹草閣敬亭陰
四照樓前水相思記
楚吟

漢儒明學日魯壁授經人
闕里諸生舊關門祖帳
新水停梅冶夕山及謝家春
婚宦何年畢清溪共
卜鄰

澣山二首

書堂高在南山巔日射峰頭生紫煙昨夜雨消春
水漲雲中飛下百重泉
寺裏人看寶誌迴湖邊簫鼓晚仍開撐船直入花
深處雲葉當頭山雨來

贈勞山隱者

何許藏名地秦山海上深半夜白日出風雨蒼龍
吟靜侶行道處不聞樵采音清泠魚山梵寂寞成
連琴曉就諸天食暝棲蒼蘂林因知安居法一契
無生心我亦山中客悠悠悔陸沉

太和莊作

林薄稍縈帶溪流清且長人家埽殘雪雞犬臥朝陽
石路初迴曲前峰轉鬱蒼子真思谷口涉此悔行藏

遙送魏推官赴成都

昔君送我去隋堤隋堤柳色垂青絲我今送君之
錦里錦城花發岷江水岷峨山高入雲上應井絡垂
星文羌秦久判黃龍誓襁蜚常懸赤甲軍白鹽赤甲
三城戍十年割據蠶叢路父老雖悲望帝魂公孫終
爲當塗誤年來巴蜀漸消兵玉壘嵯峨

綿洛清賓人。夔女登堂舞。爨部冰兒負弩迎使君。
本自三吳彥。清忠家世人。爭羨詞賦誰邀漢主知。
風流却許文園見。衰斜亂後少行人。劍閣連雲最
苦辛。楊花飛處經新雨。杜宇啼時過暮春。知君壯
游恥拘束。定有高文傳諭蜀。板楯蠻歸益部平。登
臨放酒春江曲。蜀江吳水不通潮。曾共黃壚貫紫
貂。秋來獨對蕪城月。憶爾成都萬里橋。

再送魏推官兼寄蜀中故人

送爾居然萬里行。東風殘雪照離旌。啼猿曉渡青
衣水。落木秋臨白帝城。益部山川皆秀麗。華陽士

女最聲名漢南親故如相憶共聽渝歌一愴情

賦得春草碧色留別

南浦人將別西洲草正芳含煙拂流水將思結垂
楊蘭澤誰當采天涯路正長離愁紛似汝終古在
河梁

涵水上留別家兄太液禮吉子側暨諸猶子

二首

靡靡卽長道鬱鬱難具陳人生重離別況乃骨肉
親官橋水邊柳征夫衣上塵相眎宛將別含意何
由申昨宵一堂宴明日千里人且復緩須臾佇立

長河津

幼穉羣牽衣問我歸何時我行越江介會合寧詎
知長河漂母墓春樹淮陰祠此行多感激念爾復
傷悲登車不成別淚下如懸絲

寄二幼妹

高堂送遠淚霑裾賴爾加餐慰倚閭故里鶯花三
月暮行人消息大雷書

臨朐道中作二首

芳月辭鄉去汀洲徧綠波高堂念行李遠客渺關
河地入朱虛古山連青社多明朝穆陵路目斷北

鴻過

野水春風起青山落日斜
雲嵐生近壑鳬雁聚圓
沙迢遞鄉程隔縈迴別思賒
吾家長白曲兄弟各天涯

午睡過穆陵關覺後感成二首

崎嶇驛路萬重山鄉夢猶能夜夜還
忽聽竹雞驚午枕白雲已失穆陵關

穆陵關南煙草愁穆陵關北棟花秋
關門鎖斷清溪水不寄離心向北流

渡淮作

凌風下淮口舟子暮相催杳杳水天合蒼蒼葭菼
來帆飛公路浦鳥下淮陰臺亦是乘槎客中流思
轉哀

懷曰緝

忽有都門信聞君廢蓼莪愁驚時序改涕為故人
多楚樹通梁苑隋堤接汴河何時共尊酒腸斷五
噫歌

露筋祠

放舟湖上水機杼女郎祠往蹟行人說清風古牒
垂畫衣生積蘚荒徑颯靈旗叢竹香蘋路依稀近

九疑

邵伯舟中

一望遙天闊
茫茫泛夕槎
樹分甓湖水
月上楚人家
野戍寒蟲亂
迴堤古廟斜
蕪城前路近
宮柳欲棲鴉

高郵雨泊

寒雨秦郵夜
泊船南湖新
漲水連天風
流不見秦淮
海寂寞人間
五百年

寶應

畫舫垂楊千
萬絲淮南江
北斷腸時誰
堪此夜青

天月碧草濃煙宿射陂

淮安新城有感二首

澤國陰多暑氣微一城烟靄晝霏霏春風遠岸江
離長暮雨空堤燕子飛四鎮蟲沙成底事五王龍
種竟無歸行人淚墮官橋柳披拂長條已十圍
開府當年據上游建牙賜爵冠通侯即看別院連
雲起更引長淮作帶流荒徑人稀鼯鼯嘯野塘風
急荻蘆秋永嘉南渡須臾事忍向新亭問楚囚

劉堡雨行

寒色起菰蘆川光盡有無天低寶應縣雲壓射陽

湖淺澤魚龍蟄
高空雁鶩呼
春來添肺疾
撥悶強枝梧

大觀閣上眺白馬湖

千仞憑欄俯射陂
亂帆暝色去何之
鐘聲遠出寒林寺
白馬湖頭落日時

界首驛寄家兄

楚天風送采菱舟
菱葉青青稻葉秋
兄弟相思二千里
木蘭亭北驛南樓

雨中陳園聽歌

舊蹟鄰螢苑
登臨遠恨生
不辭衝雨到
兼作摘船

行水市垂楊合重樓玉笛清隋宮有遺曲惆悵若
爲情

沈家渡

平蕪鶴脚綠濛濛十里輕帆逐便風遙指吳陵城
已近斜陽小市水車紅

瓜洲道中有感

垂楊垂柳拂關河白舫朱樓映逝波春雨蕪城寒
浪靜夕陽京口暮山多雷塘事去空禾黍螢苑人
稀罷綺羅欲向江頭頻望遠不堪灑淚石城歌

雨舟偶成

推蓬失清曉渺渺雜人煙夜雨迷黃浦繁花滿白
田漁家秔稻外野寺鷺鷥邊慚愧垂竿叟長謠過
我前

江上懷汪程劉三子兼寄家兄西樵二首

佛壯談詩登祕閣

周量小字時聞
舒人之命

液仙趨府算錢刀

文

別還思阿戩歸清潁仕隱無端愧汝曹

天寧佛火共淹留千里驚逢落鴈秋何處憑欄望

西北暮雲明月滿蕭樓

冬杪與家兄
別于天寧寺

六月七日舟中乍涼試筆二絕句

蘆荻何蕭疎風日始清美葉葉隔林帆秋心滿煙

水

茆屋映迴汀漁罾挂高樹秋氣感人懷況近陳琳墓

珠湖風雨懷家兄西樵禮吉子側

竹屋秋燈每劇棋共聞山溜下荒池而今老作江南客獨聽寒蘆夜雨時

送傅彤臣御史按江右

早傳封事動螭頭當代修期譽最優江介烽煙初攬轡中流慷慨獨登舟雲霞近出秦人洞詞賦重開帝子樓欲寄離心章貢水廣陵濤色不勝秋

送陳冰壑往江陰

君從白田來相逢話疇昔高齋聽疎雨流連坐清
夕朝來掩關臥復送江南客何處寄相思潮迴廣
陵驛

玉隨編修貽詩奉答三首

平山堂下放舟時醉倚蘭橈雪蕩絲笑我支離頻
臥閣藥爐禪版正參差

琅琊山間明月谿風流遺蹟醉翁題君家兄弟避
人處南隱之南西澗西

花影當堦鶴唳長得君七教喜顛狂曲江八月秋

風起坐看洪濤白鷺翔

七發洪淋淋焉若白鷺之下翔

江上寄程崑崙二首

白浪金山寺青山鐵甕城故人今不見楊柳作秋聲

江北望江南祇隔江津水日暮寒潮生愁心滿揚子

余澹心寄金陵詠懷古跡詩却寄二首

千古秦淮水東流遶舊京江南戎馬後愁殺庾蘭成

鐘阜蔣侯祠青溪江令宅傳得石城詩腸斷蕪城

客

再過露筋祠

翠羽明璫尚儼然湖雲祠樹碧于煙行人繫纜月
初墮門外野風開白蓮

有憶

瓊姿幾樹映潺湲曾向花源夢裏攀羯鼓一聲傳
碧落畫樓九曲近青山如聞紫玉懷新侶不惜明
珠市葬顏今日白蘋江上望斜風細雨下邗關

七月七日舟中晚晴二首

蜺蜺湖邊菡萏紅金釵澗上蕩絲風故園紈扇驚

秋早銀漢迢迢一道通

小別鄉園千里餘
廣陵病客近何如
年來秋思逢
蕭瑟無復參軍舊
曬書

邀嚴子問徵君子餐
都諫方貽孝廉集
依園客從南屏來
衣上煙霞斑
落帆廣陵郭
願我虞清閒
置酒蓮葉上
鳴琴竹林間
池引汴河水
樓觀瓜步山
清秋有明月
留醉莫言還

落日

落日下長川
揚舲去安極
不辨水禽聲
十里菰蒲色

公戲自穎上寄書并寄姬人東素傳賦答

我愛清潁水君家清潁亭風流及樵牧蹤跡付沉
冥遠道勞書札寒江問客星何因瑤瑟怨中夕感
湘靈

文選樓懷古

何處登臨起暮愁蕭梁人代幾悠悠心悲寶誌詩
中語淚灑維摩江上樓玄圃風流人已盡蕪城日
落草先秋銷沉古蹟遺書在佛火寒鐘對暝流

賦得隋堤柳

邗溝南望是金城更指隋堤百感生撩亂飛花春

晝晚淒迷江曲候潮平
弩臺雨過連莎影水殿秋
來起鴈聲猶爲君王鎮
憔悴大堤如雪不勝情

韓侯釣臺歌

西風吹淮水倒流落颿一弔淮陰侯
棘叢藤蔓斷碑蝕三尺釣臺成古丘
嗟昔英雄悲蓐食垂竿憔悴無顏色
壯懷不屑典連敖形容安用時人識
一朝騰蹕起風雲登壇突兀驚三軍
帝子晚能知大將漂母早解哀王孫
雲蒸龍變陳倉道京索滎陽疾於埽
已聞傳檄定三秦拔幟還驚下全趙
丈夫生即爲真王崩通豈必謀非臧
食人之食死人事

不知鳥盡良弓藏左右早能分楚漢雲夢之遊可
三歎全身惜不如文成意氣殊羞伍絳灌千秋鍾
室淚滂沱乃公感激大風歌夷黥醢越事已矣縱
有猛士當如何雉離宮中恨終古白日蒼茫照淮
楚有酒但酹韓侯臺不洒長陵一坏土

即事

十里田田荷芰風漁舸如葉出花中鵝兒湖北煙
初暝背指明霞幾縷紅

自淮上歸維揚病中雜興六首

昨登韓侯臺臺空雜荆杞不及子陵臺突兀桐江

水

東漢臧子源慷慨申大義荒祠枕寒潮誰復千秋祀

古人去已久但見文游臺鴨鵝深秋裏啼聲夜夜哀

東指楊絲港西望秦蘭河女兒不學繡盡唱竹枝歌

召伯湖如鏡遙連甲仗樓江東名宰相陽夏最風流

錦纜空寒水垂楊祇暮鴉秋來更腸斷風雨玉勾

斜

山光寺

故隋北宮

舟過山光寺西風柳漸彫
隋宮零落盡秋日水迢迢

送李方壺暫還松江即赴南寧

斜陽對京口送子去江東
歸櫂青楓外家山綠橘
中十年耽故隱萬里逐飄蓬
地勢三江會人煙八桂通
楚峰名落雁粵水號秋風
冬實枕榔碧春花荔子紅
語音蠻峒異伏臘棘繇同
下瀨初休戰磨崖待勒功
若過銅柱側莫讓伏波雄

修復雙烈祠

寶應祀漢臧洪陳容

炎德旣銷歇，羌戎亂神京。洛陽泣銅狄，日望關東兵。
黃巾未殲滅，黑山勢縱橫。淮南有布衣，思扶社稷傾。
進說廣陵守，慷慨酸棗盟。袁張乖末路，同袍戈矛生。
磊落東郡長，淒涼東郡丞。掘鼠饗諸將，白日照忠貞。
一時兩烈士，意氣奪幽并。我來安宜縣，懷古緬儀刑。
空祠出蝙蝠，枯木飛鼯鼯。荇花被寒渚，秋蘚翳山楹。
有司罷俎豆，居人薦蓴羹。斲碑重拂拭，敲簷理茅荆。
三歎陳記室，空傳千載名。

子源與孔璋生

同里臧有答陳琳書詞義嚴正

薛戶部招飲湖心寺樓酒間索詩賦贈

高樓百尺臨淮起乘興登臨坐秋水
右顧增城煙浪中左眺湖光暮雲裏
薛公三十何堂堂談兵說劍皆老蒼
便可相從軹井里短衣射虎西山岡

寄薛戶部索画

寂坐清淮煙水間誰將雲壑破愁顏
知君作畫師黃鶴試寫江南雪後山

眞州道中

蕪城西望人煙遠秋風斜日蟬聲晚
青草迷離野渡橫行人指點隋家苑

青山

晨雨過青山漠漠寒煙織不見秣陵城坐愛秋江色

江上二首

揚子津頭鴈影遲建康城畔柳如絲秋來無限傷心色況值鑾江暮雨時

吳頭楚尾路如何煙雨秋深暗白波晚趁寒潮渡江去滿林黃葉雁聲多

即目

蕭條秋雨夕蒼茫楚江晦時見一舟行濛濛水雲

外

方山

泊舟方山港弔古方山亭隋宮羅綺盡石上蘚痕
青

瓜步眺望

眺遠空江上雙峰列翠屏莓苔瓜步碣風雨石帆
銘黛色迎船綠嵐光潑櫂青戰場悲太武濤氣晚
冥冥

皇廠河

鳬雁被沙洲沿洄一徑幽萍花紛曲岸竹色壓迴

流晚鼓滄江戍人家白板樓好乘瓜蔓水溪上問
漁舟

瓜步道上作

佛狸祠邊苦竹叢符融山外桂枝風隔江暮雨秋
千里愁聽西風白下鐘

帶經堂集卷七

帶經堂集卷八

歙門人程哲校編

新城王士禎貽上

漁洋詩八

庚子稿

雨後觀音門渡江

飽挂輕帆趁暮晴
寒江依約落潮平
吳山帶雨參差沒
楚火沿流次第生
名士尚傳麾扇渡
踏歌終怨石頭城
南朝無限傷心史
惆悵秦淮玉笛聲

夜登燕子磯

渡江訪名山
層巔到曛黑
大江森欲動
浩浩千里色
把炬石燕飛
燦犀潛蛟匿
北望靈巖塔
知是專

諸邑悲慨下霑襟此意誰當識

宿弘濟寺曉登觀音巖眺望

擊楫凌滄洲投宿招提境入門優曇香聞鐘夜方
永高枕聽濤聲層軒抱江影曉來微雨過紅葉滿
高嶺憑欄見萬里雲物殊清迥長山去蜿蜒上流
壓江郢海門控金焦蒼煙翳朝景信美睇山川霸
圖遞煙冷何如學無生抗跡雲峰頂

曉雨復登燕子磯絕頂

岷濤萬里望中收振策危磯最上頭吳楚青蒼分
極浦江山平遠入新秋永嘉南渡人皆盡建業西

風水自流灑酒重悲天
斬險浴鳧飛鷺滿汀洲

再題絕句

琳宮碧樹俯寒流
漠漠江天葉葉舟
偶愛扳罾坐巖石
柳絲飛落釣人頭

雨中望雞籠山

金陵城北雨濛濛
山色波光遠近中
見說後湖烟水盡
誰能拄頰望雞籠

寄一靈道人

聞師江海去幾日
剡中還昨朝逢越客
知下沃洲山

寄崑麓

青溪竹林寺日暮竹林深雪後無人跡
哀猿時一吟

送爾成從兄赴屏山四首

朝下譚侯命聞開棘道新
青衣流萬里黃綬及三春
古寺餘唐壁荒城半峒民
山山杜鵑發鄉思想露巾

西轍來賓日中郎建節秋開山
通大鹿徼水過旄牛官
橘千頭樹兵蘭萬仞流
無悲邛笮遠猶是古梁州

浮槎窮黑水懸索度朱提祀古傳金馬江清見石
犀芋田荒歲改火井戰場迷此去文翁化牂牁罷
鼓鼙

揚子津頭水懷人萬里橋褒中連棧道益部上層
霄六詔風煙近三巴尺素遙一為江海別兄弟各
蓬飄

寄彭十

蕭寺鐘殘時燕山霜落夜對牀語清夕流連不知
罷落葉一紛飛離鴻遂南下激浦近青山依稀見
君舍

送念東侍郎

搖落三秋後逍遙五嶽初金庭許玄宅林屋丈人
書闕跡已終古探奇得未如歸來遠入境應是作
樓居

題徐半山山居圖二首

先生竟學道自製水田衣獨卧寒林靜故人相見
稀晚涼松鼠落曉日竹雞飛亂葉千峰裏行歌何
處歸

濃淡寫山木依稀聞亂流雲中敬亭月煙際宛谿
舟身預名僧會裝成五嶽遊邈然巖壑裏長嘯憶

丹丘

半山愛予寒江落潮之句爲作圖愚山題詩

其上和荅一首

我昨訪奇登燕磯潑墨深更徧巖壁捫蘿附葛不知險夜踏空江欲崩石掀簞作畫鹿裘翁長嘯題詩宛陵客何當結屋圖中居臥看江天落潮白

久病初出東門登舟

鶯花搖落廣陵郭野塘欲雪天蒼浪水雞野鴨避彈射斲蒲折葦如連檣江南數帆去不息金焦落日明朱方我行東征更北首吳綿豈足凌嚴霜且

復鼓柁南渡江梧宮秋氣悲吳王洞庭橘柚千樹
黃蕪絲柔滑勝蔗漿紫魚橙片不論價暫可劇飲
忘他鄉

冬曉高郵舟次

野鴨鳴漁村霜清知天曉開牕一長望湖氣何官
渺煙寒遠樹稀水落沙洲小昨泊秦郵城明及安
宜道搔首汜湖陰漁樵可終老

雪泊韓侯臺下

漂母祠前雲欲垂淮陰城外暮鐘時寒林蕭瑟炊
煙靜野水蒼茫鸛鶴飢亭長功名終古盡假王事

業幾人悲荒臺雪下寒流急國士傷心酹一卮

高郵逢繩東表兄歸菑川

共作淮南客相逢甓社湖荒林收暮網凍水折寒
蘆感別愁方集懷歸歲欲徂自傷流滯久且復立
斯須

冬曉渡江

江南雞唱早舟子報潮生估舶聞人語沙洲落雁
聲寒煙瓜步水雜樹潤州城重鎮南徐地茫茫恨
不平

登金山二首

振衣直上江天閣懷古仍登海嶽樓三楚風濤杯
底合九江雲物坐中收石簾落照翻孤影玉帶山
門訪舊遊我醉吟詩最高頂蛟龍驚起暮潮秋
三山縹緲望如何有客褰裳俯逝波絕頂高秋盤
鶴鶴大江白日踏鼉鼉泠泠鐘梵雲間出歷歷帆
檣檻外過京口由來開府地不堪東望尚干戈

金山題壁

淨業菴前竹樹圍妙高臺畔落霞飛閒身回憶三
生事曾乞雲山舊衲衣

蒜山

龍宮開別島石趾入江深水接南瀛近山連北固
陰寄奴空壁壘公瑾罷登臨願盼英雄盡東流自
古今

丹陽三首

夜火丹陽郭移舟暫解維川涂紛雨雪彌望遠淒
其戍鼓蘭陵鎮荒煙葛令祠五湖行漸近杳杳欲
何之

無悲烽火後勝蹟古雲陽陵墓南朝舊山川東路
長豐碑吳季子名歎謝中郎憑弔逢搖落前途轉
鬱蒼

言字
曲阿後湖路百里望南徐解纜從漁父臨風誦卜
居慶亭朝射虎練水暮觀魚如此堪終老窮愁悔
著書

夜行丹陽道中

倦客浮家道路長吳楓夾岸入江鄉暮雲畫角辭
京口曉月啼烏過練塘臘近江南彫綠樹年來兵
氣動朱方建康舊重丹陽尹弔古今來思渺茫

毗陵道中雨

曲港迴汀暗野橋斜風吹雨暮蕭蕭江南烏桕紅
千樹望斷春申浦上潮

夜泊有懷同家兄子側

蘭陵城邊楓樹蒼芙蓉圩上雨淋浪
估帆競落孤舟暝那得逢人問故鄉

吳季子廟下作

我行延陵城懷古心菟結讓德邈已遠
流風緬曩哲州來季當立高懷寧詎屑躬耕表遐志
亮哉子臧節慕義永無窮穹碑字難滅所悲於潛役國亂
相更迭伍胥進勇士專諸踐王血遜位固高義復
命忍臣列春秋不名賢書札理當晰嗚呼三代後
斯風久淪絕廉節起頑懦尚論義常竊縞紵思古

人空祠颯寒雪

毘陵歸舟

泊船西蠡河解纜東城路涼月澹孤舟遙村隱紅
樹杳杳暮歸人悠悠渡江去

丹陽十字碑

延陵風義著勾吳十字千年映練湖却去闔廬城
畔望可憐麋鹿滿姑蘇

丹徒鎮

舟過丹徒鎮霜楓夾岸稠潮迴揚子夕山接秣陵
秋斜日低帆影輕寒閉水樓江城多戍壘哀角動

新洲

泊京口

西日鷓鴣堰晚潮鷓鴣塘泊舟新月下回首憶丹陽

潤州懷古二首

楚雲直下大江流鐵甕城高落木秋宋帝南徐猶作鎮蕭公北顧更名樓江山勝蹟留三國海道烽煙動五州見說孫盧西犯日青燐白浪使人愁興亡六代已銷沉對此茫茫思不禁黃鵠山頭寒雨暝佛狸帳外暮濤深兵聞北府千年勁雲入西

津一片陰興劇且傾京口酒三山披豁足開襟

杜鵑樓

十三松已化龍虬藥鉢名花去幾秋天竺數莖紅
似染蕭條猶映杜鵑樓

招隱寺

筍輿越黃鶴連岡帶平楚歷歷南朝松風吹落寒
雨石楠紅始垂沙泉碧方吐遂造戴公山風氣何
清古山門映殘照雙泉咽寒嶼玉蕊不復見空亭
閉荒塢戴公昔通隱風流照巖戶漱泉彈名琴東
巡動人主清風一銷歇初地留空宇金碧漸彫殘

林壑自軒舉蕭條黃葉落寂歷幽禽語迴澗起涼
吹經堂罷齋鼓緬想剡中人蒼茫久延佇

昭明讀書臺

王孫讀書處梵夾自蕭森無復維摩室空餘雙樹
林荒臺梁碣盡夕景楚江陰古像悲猶在風流不

可尋

昭明小
字維摩

由招隱登夾山入竹林寺

籃輿俯高嶺石磴轉幽谷諸峰亂空翠澄江疊輕
縠迴望戴公宅秋氣益蒼肅紺壁隱奇杉危亭蔽
荒竹孤僧遠獨歸山鳥暮相逐樹杪見古寺松栝

三言
散林麓絕壁尚千尋紆逕非一曲初蠟阮公屐逝
將訪金粟暝坐竹林深山山靜寒綠

竹林寺

迢迢夾山道幽幽竹林寺林公闢山處泉澗饒古
意鐘磬聞諸天花藥覆平地森梢萬竿竹煙景滿
空翠慈烏識禪心清猿起愁思平生江海情蕭然
但高寄回首禮白雲何時謝塵累

林皋和尚塔院觀林公泉

祖堂白雲裏峒崑俯林樾昔人不可見巖桂花猶
發惟有林公泉涓涓漾明月

竹林寺題壁

日暮南山裏山僧遠獨歸竹林覆殘雪石礧掩荆扉行道花常落焚香鳥自飛京江泉壑好朝夕在清暉

象山觀音菴

夾道皆修竹幽禽上下飛蕭條臨曲岸蒼翠滴人衣曉嶂青千疊晴江碧四圍買山何必遠此地足忘機

吸江亭觀落照

返照入長江江流自平遠坐眺愛青山白雲獨歸

晚

尋瘞鶴銘

我思華陽人古銘傳瘞鶴披蘚下崩崖天寒水方落

與崑崙古樵即事

了了松間月泠泠石上泉
焦仙祠外望山色杳江天

贈古樵道人

入院逢枯木尋山問古樵
樵椎何處在試聽海門

潮

枯木堂唐枯木禪師所居

晚登焦山

長松古竹覆山根，小艇探幽破蘚痕。
枯木堂中齋磬晚，水晶菴外大江昏。
洞開三詔臨青壁，浪打雙峰直蘸海門。
醉下高巖尋瘞鶴，寒濤激石暮崩奔。

焦山曉送峴崙還京口

山堂振法鼓，江月挂寒樹。
遙送江南人，雞鳴峭帆去。

海門歌

岷峨東下江水長，遠從井絡來吳鄉。
奔濤萬里始一曲，古之天塹維朱方。
北界中原壯南紀，魚龍日

月相迴翔中流一島號浮玉登高眺遠何茫茫長
空飛鳥去不盡江海一氣同青蒼山外兩峰遠奇
絕雙闕屹立天中央左江右海辨雲氣如為八裔
分紀疆江流到此一縛束早潮晚汐無披猖燭龍
曉日出雲海山光照曜連搏桑年來海戍未停罷
我舸大艦來汪洋胡豆洲前起烽火徒兒浦上披
衲襠古聞京口兵可用寄奴一去天蒼涼我願此
山障江海七閩百粵為隄防作歌大醉臥巖石起
看江月流清光

別焦山

帆影乘流下泠然別梵音相逢乞食侶未慙住山
心紺殿明松日清江映竹林永懷焦處士千載濯
塵襟

登北固絕頂多景樓

金焦一擢乘風下放眼來登北固樓梁帝旌旗寒
浪沒孫郎勛業甕城秋千層臺閣凌雲起萬疊江
山拍座浮自到三山清興極便乘暇日坐銷憂

海嶽菴拜蘇米二公像

前輩風流地爲菴易研山淨名猶故蹟磨衲識清
顏江月長如此高人去不還惟應餘翰墨終古照

人間

瓜洲渡江二首

昨上京江北固樓微茫風日見瓜洲層層遠樹浮
青薺葉葉輕帆起白鷗
揚子橋頭雞未鳴瓜洲城外日東生風波不憚西
津渡一見金焦雙眼明

玉山夜歸

渺渺空江路人歸獨夜舟迴看玉山暝遙下石簾
流佛塔鈴相語漁篷火未收霜天聞擊柝髣髴辨
瓜洲

送楊集虛歸盱江

聞君讀書處門對金船峰齋閣花時雨寒林定後
鐘諸天朝共食樵客晚相逢入洛思前事還山邀
去蹤凌煙拂鸞鶴散髮弄芙蓉板渚潮痕落邗江
酒思濃談經時有暇爲寄別來悰

登銀山絕頂

直到銀山高處行長江波浪午時生盤迴閣道空
中出層疊雲峰掌上平下瀨朱旗依戍亂高飛白
鳥過江明荀郎持節年猶少容鬢臨流轉自驚荀

郎鎮京口月年二
十九子少兩歲耳

瓜洲于園二首

于家園子俛江濱，巧石迴廊結構新。
竹木已殘魚鳥盡，一池春水綠憐人。

風寒江上草萋迷，閒踏春泥過澗西。
一樹冬青青不改，映門猶自照清溪。

飲秋厓環溪別業

撥櫂淮陰城，停帆射陽曲。
故人千里歸山家，酒初熟。
夕日隱寒雲，澄波映蒼竹。
欲去還復留，依依別林麓。

送毛吳江

別思徘徊溝水頭君行幾日到蘇州白鷗飛處停
官舫碧嶂晴時見郡樓橘柚寒雲千里暮煙波返
照五湖秋垂虹亭畔蓴絲美一向江東寄遠愁

憶焦山別峰菴

煙消日出見江南雲木參差映曉嵐曾向焦仙祠
外望至今留憾別峰菴

抱琴亭

寒叢響凍禽曲檻鳴修竹幽人獨抱琴雪壓池邊
屋

帶經堂集卷八

帶經堂集卷九

歙門人程哲校編

新城王士禎貽上

漁洋詩九

辛丑稿

迷樓懷古二首

東都無復翠華游
樵牧千年識廢丘
錦纜銷沈餘落照
垂楊憔悴覆寒流
祇今清楚留初地
自昔迷藏有舊樓
回首穠華盡黃土
斷煙渺渺見邗溝
鳧舫雞臺蔓草荒
偶尋故蹟一沾裳
綺羅何處空隋苑
風景依然在蜀岡
桃葉陳兵猶旦暮
楊花聽曲益淒涼
景陽宮畔臘脂井
江北江南總斷腸

第五泉

西憶峨眉雪高寒萬里心蜀岡汲春水猶是峽中音

同諸公訪栖霞寺

平山堂外柳如煙古寺同尋第五泉風靜鐘聲臨岸曲雨晴山色隔江天雷塘有徑生春草板渚無波作墓田惆悵隋唐一彈指不如初地老棲禪

平山堂作二首

廣陵城北早春時寂寂東風柳未垂不見歐公游賞地荒亭片石使人悲

偶來折柳向平山幾樹柔條未忍攀一種輕黃江
水上依依曾照昔人顏

上方寺訪東坡先生石刻詩次韻

附跋

昔出蜀岡道黃葉鳴秋蟬今來上方寺綠萼破春
煙坦步寶帶側延眺隋城顛古剎龍象寂殘碣蛛
絲懸緬思峩嶠人文采真神仙贈詩日南使賓佐
皆豪賢邈然竟終古漱墨留春泉老筆欲飛動妙
態殊便娟空堂響人語怖鴿飛聯翩後遊慨今昔
憑弔當同然

寺有泉
名第一

右大蘇先生送李孝博使嶺表詩凡十韻碑在

上方寺斷仆已久鐵厓道人猶及見其墨澤謂
風骨過顏柳不在二蔡下今年春維舟竹西別
墅步往上方尋此石所在拂拭出之摩娑三歎
如與公晤言酬唱於當日而信廉夫之言不虛
也歸舟取元韻次之并刻石斷碑之側云

大風渡江望金山

冥冥互父山浩浩揚子津風波不可渡愁殺峭帆
人

京江夜雪

揚子津邊揚片席暮角聲傳京口驛北風一夜江

上寒鴻鶴山頭雪幾尺去年曾上春秋樓蘆花楓
葉如清秋何當踏雪三山頂第一江山萬里流

甘露

寺有宋吳琚題榜
曰天下第一江山

丹徒行弔宋武帝

曲阿之北京口東寄奴王者真英雄新洲伐荻殺
龍子大業遂建丹徒宮桓家小兒亂天紀投袂勤
王夜中起擣菹百萬皆人豪龍行虎步非凡理從
茲大運屬彭城中原趙魏歸經營硤口千軍五龍
涸藍田一戰二嶠平南北推移幾千載太息雄圖
竟何在宿麥寒原少昔人神鴉社鼓成空塞王氣

銷殘帝宅荒悠悠江水不勝長忠臣徒歎素開府
天命還歸蕭建康

呂城雪霽二首

雞鳴呂城鎮日出市橋東雪屋迴汀口煙檣野竹
中鳥飛皆貼水舟泛若乘空古蹟成荒壘行行慨
阿蒙

午夜雲陽道扁舟狎老漁神亭雪幾許直瀆路何
如煙水懷前侶江湖未定居斲橋叢樹裏何處卜
吾廬

奔牛道中寄毛吳江

南望思橫扇伊人在具區愁心與江水日夜下東
吳采采春方至堂堂歲又徂寄書初見雁念別豈
思鱸前路臨申浦相思滿太湖問梅玄墓寺濁酒
待君沽

舟暮

向晚金牛道林寒響宿禽雪晴煙樹小日夕竹園
深川路通蕭港扁舟動越吟蘭陵今夜酒無那故
鄉心

懷家兄西樵禮吉同子側作

安穩蒲帆挂北風江村雪後夕陽紅燕山錦水千

重路香草河邊起暮鐘

櫂歌四首

有序

昔人云今之竹枝詞雖鄙俚尚有三緯遺
意有先以欸乃發聲而後歌者有旣歌而
以欸乃為餘音者其聲清遠其意悽愴舟
行丹陽道中戲成櫂歌四首令舟人歌之
猶元次山湘中之欸乃曲耳

潤州城北江水流丹陽城下甯河舟江船風浪多
顛險河船安穩不須愁

觀音山在官河旁山外長湖是練塘山邊驛卒撈

津鼓湖上人家插稻秧

犇牛鎮接呂蒙城大雪連朝人不行
簫鼓喧喧南復北驛夫牽纜候雞鳴

柵口旁邊是妾家門臨秋水照菱花
朝來卜得南陵信鵝鵝雙飛上釣槎

梁溪道中却寄毗陵故人

落日梁溪道西風客子顏平蕪眺天末
遙見九龍山頗憶春申澗無人夜潺湲
如何攜逸侶雪後此躋攀

夜過梁溪不得登惠山

毗陵一櫂午煙分，薄暮江城伴水雲。
欲試名泉陸桑苧，未看林際春申君。
風塵十載身將隱，洞壑千重思欲紛。
此去伯通橋下過，五噫回首復何云。

許墅舟中眺陽山殘雪

日出陽山外，參差見幾峰。
依稀露烟靄，窈窕明雲松。
忽憶梅花發，清溪深萬重。
扁舟欲乘興，杳杳暮天鐘。

懷駿孫時讀其從姑幼玉遺詩

鳳脰燈寒共帝城，銀河小院語平明。
蜀川消渴人如昨，洛水微波賦競成。
寂寂武原春嶂遠，迢迢江

浦暮潮生謝娘柳絮班姬扇欲問仙源上玉清

虎丘二首

闔廬霸業夕陽沉鐘梵空山自古今劍去虎丘青
嶂在水枯鶴澗碧苔侵吳宮歌散聲猶苦越絕書
成怨不任惟有生公臺畔石年年白月照禪心
登臨一上可中亭疊嶂回巒面面青昔日山堂誰
說法至今片石尚精靈四圍竹翠晴猶滴萬壑鐘
音晚更聽乘興探梅竟忘返白公堤外雪冥冥

闔廬墓

劍池春水日清虛石壁臨風弔闔廬於越行成誰

三
十
狡獪夫椒往事重欷歔飄零王氣傳金虎寄冥空
山葬玉魚太息恩讎竟何在荒臺青草認姑胥

虎丘雪浪軒眺望

高閣滴春雪溪山如畫圖輝輝浮震澤靄靄眺吳
都遠近清暉合瓏璵碧樹扶諸天坐來暝香積下
飢鳥

五人墓

流連虎阜遊宛轉山塘路石門映迴波英靈此中
聚滿壇松桂陰落日青楓樹生傍伍胥潮死近要
離墓千秋忠介墳鬼雄誓相赴酹酒拂蒼碑寒鴉

自來去

姑蘇懷古三首

爭長黃池未濟師，餘皇舟已徙熊夷。
山川終古迷商魯，花草千年怨種蠡。
故國魂銷吳苑水，行人腸斷越溪絲。
竹枝聲裏春將盡，破楚門東暮雨時。
斜日停橈喚奈何，橫塘聲散采蓮歌。
青山古道通閶闔，綠黛春風憶芡蘿。
廢苑愔愔花欲暮，長洲淼淼水空波。
千金枉鑄鴟夷像，烏自高飛避網羅。
山徑何時葬玉鳧，興亡轉瞬日西徂。
越人已自籌三策，秋祭當年竟五湖。
雨過麋城空碧草，春深鶴

市半青蕪傷心更有南陽宰不獨寒潮泣子胥

文種

歎曰南陽之宰而為越王之禽

將入鄧尉答余澹心

十載鍾山隱
逖棲聞君高
臥在南谿
浣花舊事誰
能繼
桃葉新詩手
自題
白苧風流擅江左
青山梅信隔
曇西春宵一別
閨門權酒盡
橫塘烏夜啼

夜雨題寒山寺寄西樵禮吉二首

日暮東塘正落潮
孤篷泊處雨蕭蕭
蕭疎鐘夜火寒
山寺記過吳楓第
幾橋

楓葉蕭條水驛空
離居千里悵難同
十年舊約江

南夢獨聽寒山半夜鐘

通安橋舟中

煙鬟紛出沒濃綠潑行舟
竹葉藏山塢梅花映水樓
平生一丘想今日五湖遊
颯颯蒲帆駛風烟直似秋

虎山擅勝閣眺光福以雨阻不得往

虎山橋畔盡層松掩映寒流古
寺紅却上重樓看
鄧尉太湖西去雨濛濛

由光福里入太湖口往聖恩寺

扁舟下西崦森森入湖口
逶迤鄧尉山蒼茫具區

數南來仙靈窟玄墓號稱首銅井連青芝雲錦張
左右七十有二峯遙矚皆培塿貝闕敞魚龍金庭
開戶牖仙壇毛公蛻古笈靈威守名境秘聞見勝
遊信非偶巖夢時合沓龍氣殊蚴蟉擊楫泝空明
濯纓遠塵垢將來萬峰寺半偈持茗帚

雨夜宿聖恩寺還元閣

梅樹初花石澗流滿山香雪送行舟三更蕭瑟湖
邊雨百尺高寒水上樓師子窟中嵐翠合法華山
外暝煙收霜天欲曉鯨音起萬壑聲從何處求

還元閣聽雨懷太湖

冥冥遙峰雨黯黯重湖雲萬壑急懸溜颯沓聽難
分山中梅信發香色方氤氲已蠟阮生屐將墊林
宗巾身臥百尺樓心憶五湖濱笠澤渺千里漁村
雜鷗羣園綺緬非遙逝當返吾真

曉起登梵天大悲諸閣望湖山

雲中聽雨登高閣煙外凌空俯太湖林屋仙人招
欲出鴟夷高士遠堪呼離離螺髻行相映渺渺漁
舟看漸無更憶潭西最明迴青山滿眼眺姑蘇

二峰閣
在潭西

漢月和尚塔院

門外娑羅樹湖邊修竹陰講堂宿雲影塔院寄空
林碑記中興蹟溪流常住心名衣傳法地妙相此
中尋

山中寄子側時阻雨許墅舟次

平生兄弟遠遊心世外玄棲約共尋澗道名花任
開落湖天春水半晴陰何山往事思求點五嶽前
期負向禽遙憶孤蓬宿煙雨青芝南望白雲深

即事

雨過長旂嶺花開朝士塢時見雨中人遙遙隔花
語

由拈花堂至竹深處與諸道人茶話

昔日靈山會迢迢傳至今漢公開講席重此闢香
林結宇萬峰頂安居雙樹陰拈花無漏學擊竹妙
明心祖印一何遠孫枝皆十尋禪關閉窈窕曲閣
俯蕭森積雨琅玕裏依依暝翠沉

玄墓又名萬峰

冒雨自法華鐘樓尋米堆山

僧樓鳴鐘罷徘徊向山路遠眺米堆山蒼蒼積煙
霧溪澗窅然深岡巒緬非故千重修竹林一徑江
梅樹花香上寒衲石流溼芒屨山靄接湖雲日夕
自來去迢迢五雲洞欲問誅茅處

由米堆山下行至上楊村錢家礪望湖中漁

洋法華諸山

杖策信忘疲行行畫圖裏崎嶇下雲壑蒼茫望煙
水石徑何盤紆疎籬照梅蕊寥落重湖濱柴門數
家市居人太古風但解數雞豕語我種植法敦樸
有奇理冬作多晏眠春寒常晚起雖非角里儔頗
謂桃源比逶迤到湖濬浩渺歎觀止震澤控三江
波瀾此方始法華表東陸漁洋正相似煙雨春空
濛峰巒暮倣詭昨朝梵天閣遠眺如隱几豈知方
丈山忽落芒屨底欲乞五湖長垂釣將已矣

晚坐雨花橋看梅

寒湖望已遠迢迢暮歸寺修竹隱山門金碧眩空
翠清溪枕飛梁花氣增明嬌綠萼紛競發翠羽時
一至拈花悟禪心作賦識仙意高低垂繁條明滅
見湖次縹緲吹笙人消搖布金地微微蓮花漏蕭
然遠塵思

玄墓竹枝詞八首

二月梅花爛熳開遊人多自虎山來新安塢畔重
重樹畫舫青油日幾迴

左連光福右真珠南北湖山總畫圖四十里中花

作障人家多半住花鬢

渠儂家住上楊村烏鉢峰青恰對門纔過焙茶梅
又子風光何似武陵源

鄧尉山頭片雨晴司徒廟下晚潮生却登七十二
峰閣玉柱銀房相向明

西施洞望米堆山夕翠朝煙擁髻鬟不道鴟夷曾
載去至今人在五湖間

西來銅井又銅坑山勢高低有二名試上龜峰光
福塔白波翠巘兩邊生

楓橋估客入山來鷁子多從木瀆開瑤瑤冰盤堆

萬顥西林五月熟楊梅

綠黛遙浮玉鏡間峰巒千疊水彎環居人却厭真
山好玄墓南頭看假山

題四宜堂留贈剖石道人

古德開山歲月深威儀入寺更沉沉雨花不散維
摩室金粟常飄祇樹林豎拂縱橫千佛義上堂鐘
鼓六時音水田製就從師日古塢寒香許再尋

下山遊聖恩下院復入奉慈寺看梅

住山已寂寞下山更惆悵西望竺山陰窈窕勢難
狀別院寄深幽空阿起樵唱稍東奉慈寺名藍鬱

相望碑記乾道年塵翳梵王相法雨來四山慈雲
起層嶂瀑布巖下落石溜花間漾樹疑梅檀林人
行蕊珠上依依向山靈碧湖一舟放

登光福寺塔望穹窿靈巖諸山懷古

昨登擅勝閣遙遙見湖濱聚沙矚高妙珠露高由
旬山趾理歸櫂中流望嶙峋鈴鐸天際語獅象雲
中蹲攬衣造峰頂大千俯微塵悟彼解脫義得此
清淨身名山繚四隅出沒媚煙晨眺遠跡方遐懷
古情彌辛采香已荒徑菱歌尚含顰館娃一片石
千載爲霑巾迴身望胥口落日悲孤臣

玄墓歸答李戶部

落拓江鄉歲月賒，芒屨竹杖且天涯。
青春弔古吳王苑，綠嶂探幽鄧尉花。
兩眼水雲誰作主，五湖鷗鷺便爲家。
何能共醉寒香裏，悵絕清溪箸帽斜。

登惠山寺

古寺南朝蹟，花時汗漫遊。
泉疑申澗雨，松照蠡湖秋。
伏氏青山宅，吳田碧水流。
九峰春正好，悵望此林丘。

江淹歷山詩別鶴吳田惠山古名歷山

惠山送友人往陽羨

復泊雲林櫂，孤蓬正晚寒。
春泉流錫麓，暮雨向銅

官東道花將發南陵雪未殘
明宵遙憶汝
畫與誰看

帶經堂集卷九